

TINGKAT PENGUATKUASAAN, KAWALAN DAN KESELAMATAN AKPS

1,045 pegawai kastam di 21 pintu masuk negara

Kuala Lumpur: Seramai 1,045 pegawai Jabatan Kastam Diraja Malaysia (JKDM) bertugas di 21 pintu masuk negara bermula semalam dalam membantu Agensi Kawalan dan Perlindungan Sempadan Malaysia (AKPS) mempertingkatkan penguatkuasaan, kawalan dan keselamatan.

AKPS memaklumkan pihaknya menyambut baik dan mengucapkan terima kasih atas sokongan yang diberikan JKDM mengenai pengambilalihan fungsi pemeriksaan di pintu masuk sempadan.

"AKPS memandang ke hadapan dengan hubungan kerjasama yang terjalin antara AKPS dengan JKDM dan akan terus kukuh bersama-sama merea-

lisasikan hasrat kerajaan dalam mendaulatkan sempadan negara demi kesejahteraan seluruh rakyat Malaysia," katanya dalam kenyataan kelmarin.

Terdahulu, fungsi pemeriksaan di pintu masuk sempadan negara yang sebelum ini dilaksanakan JKDM diambil alih sepenuhnya oleh AKPS secara rasmi.

Ketua Pengarah Kastam Malaysia, Datuk Wira Anis Rizana Mohd Zainudin dilaporkan berkata, langkah itu sebahagian inisiatif kerajaan memperkukuh kawalan keselamatan dan penguatkuasaan di sempadan.

Beliau berkata, secara keseluruhan sebanyak 1,053

waran perjawatan pegawai JKDM sudah dipindahkan kepada AKPS.

Fasa pertama pelaksanaan bermula pada 1 Januari lalu di Rantau Panjang, Kelantan membabitkan lapan pegawai JKDM yang dipindahkan ke AKPS.

Fasa kedua membabitkan 21 pintu masuk tambahan dengan perpindahan 1,045 pegawai semalam.

Katanya, dengan pengambilalihan itu, AKPS kini bertanggungjawab melaksanakan pemeriksaan terhadap pergerakan individu, kenderaan serta barangan

dagangan di semua pintu masuk sempadan negara. JKDM

pula akan terus kekal sebagai agensi pemungut cukai tidak langsung utama negara di semua pintu masuk darat, laut dan udara dengan memberi tumpuan kepada fungsi teras iaitu penaksiran serta kutipan cukai.

Pengukuhan peranan AKPS diyakini mampu memperkukuh usaha membanteras penyeludupan serta jenayah rentas sempadan serta menjamin keselamatan rakyat dan memelihara kedaulatan negara.

JKDM pula optimis kerjasama erat dengan AKPS akan memastikan proses pelepasan dagangan dan pergerakan individu berjalan lancar serta menyumbang kepada peningkatan hasil negara.

Fungsi pemeriksaan di pintu masuk sempadan negara diambil alih sepenuhnya oleh AKPS secara rasmi